

## **Protocol dalla radunonza communal dils 25 da november 2022 allas 20.15 uras en casa da scola a Breil-vitg**

**Perstgisas:** Maria Luisa Middea, geraua

**Presenza:** 124 persunas

**Tractandas:**

1. Beinvegni ed approbaziun dil protocol dils 26 da november 2021
2. Approbaziun: credit supplementar Meglieraziun funsila Vuorz
3. Approbaziun: credit per igl augment dil capial d'acziar  
Pencularas BVA SA
4. Preventiv e quen d'investiziun 2023
5. Pei da taglia 2023
6. Varia

### **Beinvegni ed avertura**

Il president communal, Clau Schlosser, fa a tuts presents in cordial beinvegni, alla radunonza communal.

Il president communal resumescha las lavurs principalas dil davos onn e tgei che ha fatschentau la suprastonza il pli fetg. El engrazia als colegas da suprastonza per il sustegn sco era allas conlvrerars ed als conlvrers da vischnaunca per lur lavur prestada el davos onn.

Sco dumbravuschs vegnan Andreas Cadonau, Sonja Tenner-Alig e Corsin Albin nominai ed elegi unanim.

La gliesta da tractandas, ch'ei stada publicada els davos fegls ufficials, vegn suttamessa alla discussiun. Da tala vegn buca fatg diever e per consequenza vegn la gliesta declarada ligionta per la radunonza communal da questa sera.

### **1. Approbaziun dil protocol dils 26 da november 2021**

Il protocol ei staus exponius sin canzlia communal sco era sin la pagina d'internet dalla vischnaunca. Dalla discussiun vegn fatg negin diever. Il protocol dalla davosa radunonza communal vegn per consequenza approbaus unanim.

### **2. Approbaziun: credit supplementar Meglieraziun funsila Vuorz**

El vischinadi da Vuorz vegn el mument sanau las vias da Meglieraziun. En quei connex ei stau publicau naven dils 27 da matg 2022 entochen ils 27 da zercladur 2022 ina adattaziun dil project approbaus ils 16 da november 2010 dall'antieriura vischnaunca da Vuorz. Encunter tala publicaziun ei vegniu fatg neginas protestas, aschia ch'il departement d'economia dil Cantun Grischun ha cun disposiziun dils 5 d'uost 2022 approbau quella adattaziun.

Las vias supplementaras che duein vegnir sanadas ein :

Run dil Tschegn – Gneida / Via Sutvitg – Plaun da Crusch / Via Sutvitg – Spral e Curtginet – Foppas.

Tenor calculaziun da cuosts digl inschignier muntan quei cuosts supplementars da frs. 1'843'000.00. **La suprastonza sco era il cussegl da vischnaunca fan la proposta**

***d'approbar quei credit supplementar. Contribuziuns cantunalas e federalas ei da quintar cun 65%.***

La discussiun vegn dada libra. Cunquei ch'ei dat negina discussiun vegn votau giu. Cun tscherna unanima decida la radunonza d'approbar il credit supplementar sco proponius dalla suprastonza e dil cussegl da vischnaunca.

### **3. Approbaziun: credit per igl augment dil capital d'aczijs Pendicularas BVA SA**

Las Pendicularas BVA SA ston far igl onn 2023 grondas investiziuns, vul di construir in baghetg per la tecnica cun luvratori, garaschas per las maschinas da pista, magasin, tancadi eav. (frs. 2 milliuns) sco era sanar e per part baghegiar da niev l'ustria (frs. 2.5 milliuns) sin l'alp Dado. Total pia ca. frs. 4.5 milliuns.

Malgrad ils resultads da fatschenta cuntenteivels dils davos onns eis ei buca pusseivel all'interpresa da finanziar l'investiziun senza alzar il capital d'aczijs. Quei duei succeder en duas etappas. Il cussegl d'administraziun fa la damonda alla vischnaunca per ina participaziun da frs. 1 milliun. La Banca Cantunala ei sunter fetg biars onns puspei promta da conceder novs credits allas Pendicularas BVA SA. In credit dalla banca dat ei denton mo, sche era la vischnaunca investescha. Las bancas finanzieschan mo rescas supportablas, ed aschia sa era la vischnaunca valetar il risico d'engaschament sco serius.

Cun la separtizaziun dalla vischnaunca cun frs. 1 milliun en fuorma d'aczijs ein las Pendicularas BVA SA promptas da surschar in sez el cussegl d'administraziun ad in(a) representant(a) dalla vischnaunca.

Sunter madira ponderaziun ed examinaziun dalla situaziun fa la suprastonza communal sco era il cussegl da vischnaunca, en vesta all'impurtonza dallas Pendicularas BVA SA per il futur da nossa destinaziun turistica, la proposta da separticipar vid igl alzament dil capital d'aczijs cun ina summa da frs. 1 milliun. Vitier vegn aunc la taglia tenor lescha davart las taxas da bul (Stempelsteuer). Aschia munta il credit a frs. 1'010'000.00. Il messadi ei vegnius tarmess tier en mintga casada aschia che tuts han saviu studegiar e far las ponderaziuns giudlunder.

Il president communal declara daco che quella fatschenta vegni buca votada giu all'urna. Tenor costituziun art. 32 e sunter haver consultau il cantun sto la radunonza communal decider sur da fatschentas tochen frs. 2 milliuns.

La discussiun vegn dada libra.

Martin Beer ei buca cuntents cun las explicaziuns el messadi e resumescha en in votum da varga 30 minutas la historia dallas Pendicularas BVA SA e con che la anteriura vischnaunca da Breil ha schon investau (senza Andiastr e Vuorz) els davos 50 onns. Alla fin da siu votum fa el la proposta da desister sin la votaziun da questa sera e da pretender in concept per igl avegni dallas Pendicularas e sia finanziaziun.

Ils ulteriurs votums da Othmar Seiler, Ervin Caduff e Theo Cavegn ein da sustener la proposta dalla suprastonza e da votar per igl alzament dil capital d'aczijs.

Cunquei ch'ei dat neginas autras damondas pli vegn votau giu. Sco emprem vegn votau giu sur dalla proposta da Martin Beer da desister sin la votaziun questa sera: La radunonza decida cun 106 GIE encunter 8 NA da votar giu sur da quell'investiziun questa sera.

Sunter quella decisiun vegn passau tier la proposta dalla suprastonza e dil cussegl, d'approbar in credit per igl alzament dil capital d'aczijs. Cun 113 GIE encunter 5 NA approbescha la radunonza igl alzament dil capital d'aczijs sco proponiu.

#### **4. Preventiv e quen d'investiziun 2023**

Il preventiv siara suenter expensas da frs. 14'102'600 ed entradas da frs. 15'910'465 cun in surpli entradas ell'altezia da frs. 1'807'865. Quei preventiv ei vegnius tschentaus si tenor las cefras dil quen 2021 ed il preventiv 2022. Il quen d'investiziun preveda expensas da frs. 5'290'000 ed entradas da frs. 602'000. Las investiziuns netto muntan per consequenza a frs. 4'688'000.

Il president communal repassa il preventiv dil quen current sco era il quen d'investiziun e dat sclariments necessaris tier tut las posiziuns. Dalla discussiun vegn buca fatg diever. Ils presents approbeschan il preventiv sco era il quen d'investiziun 2023 cun tscherna unanima e senza reservas.

Suenter l'approbaziun presenta il president aunc il plan d'investiziuns per ils proxims quater onns. Quei plan ei in instrument da lavur per la suprastanza ed aschia semida quel ualti spert. La radunonza pren per enconuschientscha dil plan d'investiziuns per ils proxims quater onns.

#### **5. Pei da taglia 2023**

Mintg'onn han il cussegl da vischnaunca sco era la radunonza communal la pusseivladad da fixar il pei da taglia sin entradas sco era il pei da taglia sin schischom.

Cunquei che havein reduziu igl onn vargau il pei da taglia sin 90% fa la suprastanza sco era il cussegl da vischnaunca la proposta da schar il pei da taglia sco tochen dacheu.

La taglia sin schischom sto tenor lescha da taglia era vegnir fixada mintg'onn da niev. Quella importa denter 1.5 entochen 2.0 promils. La suprastanza sco era il cussegl fan la proposta da restar sco tochen dacheu sin sin 1.7 promils.

La damonda vegn suttamessa alla discussiun. Cunquei ch'ei vegn buca fatg diever dalla discussiun vegn passau tier la votaziun. Cun tscherna unanima decida la radunonza communal da restar tier il pei da taglia ordinari 90% dalla taglia cantunala semplia e da restar sin 1.7 promils tier la taglia sin schischom.

#### **6. Varia**

Dil tractandum varia vegn buca fatg diever.

Clau Schlosser engrazia per la presenza, la partizipaziun e la confidanza. El siara la radunonza allas 21:55 uras e giavischa a tuts in bi temps d'advent ed in bien retuorn a casa.

Breil, 28 da november 2022

**Il president**

**Igl actuar**